CBETA電子佛典集成

CBETA Chinese Electronic Tripitaka Collection ebook

T12n0385

中陰經

姚秦 竺佛念譯

目次

- 編輯說明
- <u>章節目 次</u>
 - 。1 如來五弘誓入中陰教化品
 - 2 妙覺如來將諸菩薩入中陰教化品
 - 。3 身品
 - 4 賢護菩薩問事品
 - 5 道樹品
 - 6 神足品
 - 7 破愛網品
 - 。 8 三世平等品
 - 。9 無生滅品
 - · 10 空無形教化品
 - 11 有色無色品
 - 12 歡喜品
- 巻目次
 - o 1.
 - · 002
- 贊助資訊

編輯說明

- 本電子書以「CBETA 電子佛典集成 Version 2022. Q3」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta.org 回報。
- <u>版權所有</u>,歡迎自由流通,但禁止營利使用。

No. 385

中陰經卷上

後秦涼州沙門竺佛念譯

如來五弘誓入中陰教化品第一

如是我聞:

一時佛在迦毘羅婆兜雙樹北四十九步耶維處。

八日夜半明星出時,爾時,如來忽然離碎身舍利,如諸佛五弘誓 法:

當生之時,天地六反震動,十方諸佛皆來扶助,是謂一弘誓法。云何為六反震動?東踊西沒、西踊東沒、北踊南沒、南踊北沒、四面都踊則中央沒、中央踊則四面沒。

當其如來初舉一足行七步,天下大動,十方諸佛皆來扶助,是謂二弘誓法。

如來往詣菩提樹下結跏趺坐:「吾不成佛不起于坐。」爾時天地大動,十方諸佛皆來扶助,是謂三弘誓法。

如來之名波旬雖聞心不怯弱,誓願力故,天地大動,十方諸佛皆來 扶助,是謂四弘誓法。

如來捨身壽命,現取滅度,入於中陰教化眾生,爾時天地大動,十方諸佛皆來勸讚,是謂五弘誓法。

爾時,世尊入火炎三昧,離碎身舍利,去地七仞坐寶蓮華,使無量無限那由他眾生——天、龍、鬼神、阿修羅、甄陀羅、乾闥婆、迦

留羅、鳩槃荼、富單那、人非人——皆見如來坐寶蓮華。

爾時,世尊向舍利而說頌曰:

「於無數劫中, 養汝地種界, 吾今離汝去, 如蛇脫皮樂。 五道生死中, 無處不有汝, 權時得相離、 寂滅無所著, 威神接地種, 非汝不得度。 咄嗟!別離苦, 生死牽連著, 諸佛威神接, 所度阿僧祇。」

爾時,世尊說此頌已,從脚心上至肉髻放八十四千億光,普照三千大千世界,上至虚空界,其中眾生皆見光明,或有尋光來者、或有諸佛遣諸菩薩來至忍界者。

爾時,世尊內自思惟:「此中陰形極為微細,唯佛、世尊獨能覩見,然此眾生——有學、無學,一住、二住乃至九住——非彼境界所能覩見。吾今以佛威神入照明三昧,令四部眾,比丘、比丘尼、優婆塞、優婆夷,覩此微形。」

爾時,世尊次入無礙定,觀此空界眾生,生者、滅者,如諸如來所行禁戒,虛無寂寞,觀不淨想、百七十行苦本因緣乃至生死十二縛著。

爾時,世尊復說頌曰:

「今當入微妙,極細中陰形, 化彼眾生類, 倍於閻浮提。 常相無所著、 樂相空無定, 建立道德根, 捨壽無所染。 本從阿僧祇, 濟彼難度人, 况此微妙形? 無過此最難。 吾今弘誓心, 無雜、無所染, 菩提道德根, 梵行究竟法。 爾時,世尊說此頌已,復放眉間白毫相光,普照東方無量無限那由他世界;南方、西方、北方亦爾。爾時,世尊還攝光明,繞佛七匝從頂上入。

爾時,彌勒菩薩即從坐起,偏露右臂,右膝著地,合掌叉手,前白佛言:「快哉,世尊!昔所未聞、昔所未見。中陰眾生形質極細,壽命長短、飲食、好醜為何等類?願樂欲聞。」

世尊告曰:「諦聽諦聽,善思念之,吾當與汝一一分別。云何,彌勒!閻浮提兒生墮地乃至三歲,母之懷抱為飲幾乳?」

彌勒答曰:「飲乳一百八十斛,除母腹中所食血分。」

「東弗于逮兒生墮地乃至三歲,飲乳一千八百斛;西拘耶尼兒生墮 地乃至三歲,飲乳八百八十斛;北欝單曰兒生墮地坐著陌頭,行人 授指,[口*束]指七日成人,彼土無乳;中陰眾生飲吸於風。

「閻浮提眾生壽命百歲、東弗于逮壽命五百歲、西拘耶尼壽命二百 五十歲、北欝單曰壽命千歲、中陰眾生壽命七日。

「閻浮提人面上廣下狹、弗于逮人面正圓、拘耶尼人面上狹下廣、 欝單曰人面正方、中陰眾生面狀如化自在天。」

自此以還,釋迦牟尼名號已滅,妙覺如來出現於世。如來、應供、 正遍知、明行足、善逝、世間解、無上士、調御丈夫、天人師、 佛、世尊在虛空中坐寶蓮花,放舌相光明,照東方八十七億恒河沙 數。

彼國名化,佛名堅固,十號具足,一乘教化。見此光明,告諸菩薩、諸族姓子:「汝等見此光明不乎?」對曰:「唯然已見。世尊!不審此光,何佛光明照此世界?」彼佛告曰:「西方去此八十七億恒河沙數,世界名娑呵,佛號釋迦牟尼,今取滅度,捨身舍

利,欲入中陰教化,是妙覺如來光明。汝等欲往,今正是時。」爾時,彼土菩薩百三十億,受佛教誡來至忍界。佛告之曰:「汝到彼 土禮事供養,勿懷懈慢,持吾名號問訊妙覺如來:『興居輕利、遊 步強耶?』」菩薩受教,禮彼佛足,右繞七匝,忽然不現,來至娑 呵世界。

南方去此八十七億恒河沙數,世界名解脫,佛號真淨如來,十號具足,告諸菩薩:「汝等見此光明不乎?」對曰:「唯然見之,不審此光是何佛光照此世界?」彼佛告曰:「北方去此八十七億恒河沙數,世界名娑呵,佛號釋迦牟尼,今取滅度,捨身舍利,欲入中陰教化,是妙覺如來光明。汝等欲往,今正是時。」爾時,彼土菩薩百三十億受佛教誡來至忍界。佛告之曰:「汝到彼土親事供養,勿懷懈慢,持吾名號問訊妙覺如來:『興居輕利、遊步強耶?』」菩薩受教,禮彼佛足,右繞七匝,忽然不現,來至娑呵世界。

北方去此八十七億恒河沙數,世界名琉璃,佛號雷音如來,十號具足,告諸菩薩:「汝等見此光明不乎?」對曰:「唯然已見,不審此光是何佛光明照此世界?」彼佛告曰:「南方去此八十七億恒河沙數,世界名娑呵,佛號釋迦牟尼,今取滅度,捨身舍利,欲入中陰教化,是妙覺如來光明。汝等欲往,今正是時。」爾時,彼土菩薩百三十億,受佛教誡來至忍界。佛告之曰:「汝到彼土禮事供養,勿懷懈慢,持吾名號問訊妙覺如來:『興居輕利、遊步強耶?』」菩薩受教,禮彼佛足,右繞七匝,忽然不現,來至娑呵世界。

東北方去此八十七億恒河沙數,世界名空淨,佛號虛空藏,十號具足,菩薩百三十億;東南方去此八十七億恒河沙數,世界名熾然, 佛號廣顯如來,十號具足,菩薩百三十億;西南方去此八十七億恒 河沙數,世界名星宿,佛號月光如來,十號具足,菩薩百三十億; 西北方去此八十七億恒河沙數,世界名壞魔,佛號勇猛伏如來,十 號具足,菩薩百三十億;上方去此八十七億恒河沙數,世界名海跡,佛號上妙如來,十號具足,菩薩百三十億。

下方去此八十七億恒河沙數,世界名通達,佛號無畏如來、應供、正遍知、明行足、善逝、世間解、無上士、調御丈夫、天人師、佛、世尊,告諸菩薩:「汝等見此光明不乎?」對曰:「唯然已見,不審此光明是何佛光明照此世界?」彼佛告曰:「上方八十七億恒河沙數,世界名娑呵,佛號釋迦牟尼,今取滅度,捨身舍利,欲入中陰教化,是妙覺如來光明。卿等欲往,今正是時。」彼佛土菩薩百三十億,受佛教誡來至忍界。佛告之曰:「汝到彼土禮事供養,勿懷懈慢,持吾名號問訊妙覺如來:『興居輕利、遊步強耶?』」菩薩受教,禮彼佛足,右繞七匝,忽然不現,來至娑呵世界禮事供養妙覺如來,頭面禮足,各一面坐。

爾時,妙覺如來出廣長舌,左右過耳,如優鉢赤蓮花色:「吾從無數阿僧祇劫行至清淨,無有虛妄。吾所度眾生因緣已畢,如棄屍骸在曠野中,今復造緣,更始立行。今此菩薩有立根得力、有初發意者,復有四眾未踐跡者,當以佛力威神接引,令彼大眾知過去、當來、今現在佛不可思議難有之法。」

爾時,世尊即說頌曰:

「世多愚惑人, 不入無漏撿, 還在五道中, 染污不淨行。 我雖於忍界, 拔濟 万欲苦, 善哉!昔所願, 今日已成辦。 智者誰能飲? 如人唾於地, 吾從無數劫, 修佛清淨行, 非一劫、二劫。 捨身復受身, 把土畫舍利, 若有明智者, 況復覩我形, 有不解脫者? 生死晝夜長, 愚在五道長, 斷滅無道長, 求佛泥洹長。

本號釋迦文, 留身舍利化, 今當入空界, 中陰度萌類。」

爾時,世尊說是頌時,八萬四千那由他眾生厭患生死,皆發無上正真道意;復有七十億眾生諸塵垢盡,得法眼淨;魔界菩薩七千萬眾即從坐起,收攝衣服,摩訶而去。

中陰經妙覺如來將諸菩薩入中陰教化品第二

爾時,妙覺如來、至真、等正覺察眾坐定,純一無雜,應入中陰受禁戒法,多所饒益、所度無量,建立弘誓,施行佛事。

爾時,妙覺如來入無見頂三昧,使諸大眾、無數億千那由他恒河沙數諸菩薩眾皆同一色,如妙覺如來無有差別。

爾時,閻浮提大迦葉、諸比丘、比丘尼、優婆塞、優婆夷、天、 龍、鬼神、迦留羅、甄陀羅、摩睺羅、乾闥婆、鳩槃荼、富單那、 人非人、八國王、八億百千眾生,以神足力將入中陰。

爾時,世尊於其中間而說頌曰:

「中陰迷惑等, 迷荒無三尊, 轉身向五道, 隨行所產往, 或墮二善道、 或入三惡趣。 善哉!可愍傷, 今日如來至, 此類既得度, 我願亦成辦。 無形受形教, 斷想、斷滅本, 三世諸佛等, 無不行此法。 色法自熾然, 滅以定意道, 如來真實相, 無牛、無起滅, 觀身內外空, 解知非常法。 行由癡、愛本, 如灰覆火上, 愚者謂為滅, 火本猶常存。 心為人毒本, 善、惡隨其形, 行善即趣善、 行惡即趣惡。

如人作惡行, 自謂後無報, 臨其報至時, 非親所能代。 犯戒無法行、 自稱世無雙、 裸形食果蓏、 奉事日、月、神, 自墜三惡趣, 不慮劫數期, 此等非佛子, 雖近離我遠。」

爾時,妙覺如來說此頌已,即以神力入中陰中,化作七寶講堂、七 寶高座、懸繒幡蓋,金銀梯梐,琉璃為地,後園浴池皆七寶成, 鳧、鴈、鴛鴦、異類奇鳥悲鳴相和。

爾時,世尊復以神力使彼眾生應七日終者、六日、五日、四日、三日、二日、一日終者,盡令住壽。

爾時,世尊觀彼眾生心所趣向欲得分別各住在一面,四向、四得各在一面;初發意、九住各在一面;向辟支佛、得辟支佛各住一面。

爾時,世尊化作七百億那由他七寶高座,一一高座盡有化佛,一一 化佛盡說四非常偈:

「一切行無常, 識為外塵法, 起者必有盡, 彼滅最為樂。 不牛、老、病、死, 亦不處三有, 永處虛空界, 諸佛之堂室。 無畏、無點污, 不為欲愛染, 香熏及五欲, 永盡無有餘。 若斷百八愛, 集法亦復然, 前滅後不生, 及生道果證。 佛法總要之, 三十七道品, 無願、無相、空, 諸佛之徑路。 利根眾生等, 一聞不再受, 斷以智慧劍, 如火焚山野。 難覺眾牛類, 億佛在前立, 罪根深堅固, 雖愍而難濟。 中陰受身等, 將導隨言教, 雖非本發心, 聞法則得度。」

爾時, 化佛說此頌時, 七十八億百千那由他中陰眾生起無上正真道意, 發菩提心。

爾時,妙覺如來最在中央昇無畏座,十方諸神通菩薩在左面坐;閻浮提摩訶迦葉并四部眾一一比丘、比丘尼、優婆塞、優婆夷一一在右面坐;諸天、龍、鬼神及大國王在佛後坐;從四天王、忉利天王、炎天、兜術天、廅天、波利陀天、廅波魔那天、阿會豆修天、首呵天、波利陀首呵天、須滯天、須滯祇耨天乃至阿迦膩叱天,在虚空中散華供養、作天伎樂;中陰眾生在如來前聽受法教。

爾時,世尊以佛威神令眾生等心自念言:「唯佛為我說法,不為餘者。」

爾時,世尊而說頌曰:

「如來無量覺, 神變不可量, 出入山石壁, 如鳥游虚空。 本我阿僧祇, 積行累功德, 度彼不自為, 使發菩提心。 泥洹無去來, 亦不見受者, 本我雙樹間, 轉身來適此。 誓度眾牛類, 我初發道心, 一人不度者, 吾要終不捨。 各有上、中、下, 觀此中陰人, 但以三句義, 四諦直如法。 婬、怒、癡雖薄, 要須禪定除, 八百瘡瘡病、 八萬四千垢。 施惠、持戒、忍、 精進、禪、智慧, 善權巧方便, 拔斷三畫根。 色本非我有, 誰造此色本? 了知色無形, 可謂梵志行。 為色之所惑, 吾本未成佛, 墮四顛倒法, 沒陷牛死海。 今方究色本, 觀色非直實, 受、想、行、識法, 穢污非真道。

陰、入、十八界, 二十二根法, ——悉分別, 寂然無所著。 欲界中陰人, 塵垢悉微薄, 塵十所污染, 猶如新成衣, 有日 智慧人, 抖擻塵悉去; 中陰眾生類, 譬之亦如是, 婬、怒、麝微薄, 聞法即得悟。 一向心不移, 即得須陀洹; 三轉十二法, 復得斯陀含; 即得不環道; 坐上下分滅, 苦盡癡愛滅, 得成阿羅漢。 道跡八十億; 頻來得道人, 八萬四千億; 不還得道人, 羅漢二恒沙; 百萬二千億; 趣向各佛者, 六通身清徹, 八萬四千億; 趣向菩薩心, 其數如微塵。 吾本閻浮提, 國財、妻子施、 苦行不可數, 頭、目、血、髓、骨, 意堅如金剛, 不為魔所動。 快哉!大福報, 何願而不成?」

爾時,坐上眾生作是念言:「佛獨為我說法,不為餘者。」趣聲聞道者、得聲聞道者,趣辟支佛道者、得辟支佛道者,趣菩提道者、得菩提道者。

中陰經妙覺如來入中陰分身品第三

爾時,座上有菩薩名定化王,即從坐起,偏露右臂,右膝著地,長跪叉手,前白佛言:「善哉,世尊!快說斯義曉了眾生,音響所趣,聞法易度。復有難度者——觀見眾生有婬怒癡薄者、無婬怒癡薄者,或在有對法者、或在無對法者,或在可見法者、或在不可見法者,或在有漏法者、或在無漏法者,或在有為法者、或在無為法者,或在可記法者、或在不可記法者,或在欲界法者、或在不可解法者,或在色界法者、或在無色界法者,或在中陰微形法者、或在

中陰非微形法者,或在五色識法者、或在五色非識法者,或在非想非不想識法者、或不在非想非不想識法者,或在一住至九住者、有在一住非一住者、有在九住非九住者——唯願世尊一一敷演,令諸菩薩永無猶豫,眾生之類聞法解脫。」

爾時,世尊以梵淨柔濡之音讚定化王菩薩曰:「善哉,善哉!族姓子!乃能於如來前作師子吼。今當與汝一一分別,諦聽諦聽,善思念之。汝所問者:可見法、不可見法者,為眼見色?為色入眼?」

定化王菩薩言:「亦不眼見色,亦不離眼;亦不色入眼,亦不離色。」

佛告定化王菩薩:「族姓子!眼非色、色非眼,何者是觀?」

定化王菩薩白佛言:「識法實住,觀法乃起。」

佛告定化王菩薩:「云何,族姓子!識為有法?識為無法?」

定化王菩薩白佛言:「識非有為,不離有為;識非無為,不離無為。」

佛告定化王菩薩:「何謂有為?何謂無為?」

定化王菩薩白佛言:「起者有為、住者無為,於第一義法不見有起、不見在住。法性清淨,無色、無識,於泥洹法無所染著。眼非色、色非眼,無可見法、無不可見法。過去眼、過去色、過去識,未來眼、未來色、未來識,現在眼、現在色、現在識,非有眼色識、非無眼色識,是謂泥洹清淨法。」

爾時,定化王菩薩:「今欲聞如來說有對、無對法。」

佛告定化王菩薩曰:「族姓子!聲為有對耶?無對耶?」

定化王菩薩白佛言:「聲亦有對、亦無對。」

佛告定化王菩薩:「聲亦不有對、亦不無對。云何,族姓子!此聲 彼應為有?為無?為虛?為實?云何,族姓子!虛空可畫得成字 不?」

對曰:「唯然,世尊!不可得也。何以故?如來習行於阿僧祇劫,亦不見有、亦不見無,亦不見有三世、亦不見無三世,乃至非想、非不想亦復如是。」

爾時,定化王菩薩白佛言:「上諸法觀——悉知,唯願如來、至真、應供、正遍知、明行足、善逝、世間解、無上士、調御丈夫、天人師、佛、世尊說三微妙法何者最妙?中陰形耶?五色識形耶?非想非不想識耶?」

爾時,世尊知眾會心皆有疑,即於座上而說頌曰:

「吾受三界苦, 愚惑癡愛心,

經歷阿僧祇, 在有亦在無。

破壞生死劫, 今乃得成佛,

以本弘誓願, 度於不度者。

佛力無等倫, 三界無比尊,

一向無二心, 自誓得成佛。

吾從政炷佛, 初發無等心,

欲縛所纏裹, 堅固難可拔,

空定、無相、願, 分別三三昧。

先念出入息, 分別善惡道,

執心擎油鉢, 行步不失儀。

猶人見劫燒, 焚燒重罪者、

福昇光音天、輕者於他方。

三品眾生類, 中陰受形者,

受化不思議, 非我誰能說?

五色識眾生, 不同於三界,

如來最勝尊, 入彼識教化。

一一分別說, 不遭百八愛:

應成須陀洹, 為說須陀洹; 應成斯陀含, 為說斯陀含; 應成阿那含, 為說阿那含; 應成阿羅漢, 為說阿羅漢; 應成辟支佛, 為說辟支佛; 應菩薩道者, 為說菩薩法。 得須陀洹者, 三十二億人; 得斯陀含者, 四十二億人; 五十二億人; 得阿那含者, 六十二億人; 得阿羅漢者, 得辟支佛者, 七十二億人; 得菩薩道者, 八十二億人。」

爾時,世尊重說頌曰:

「本我無心法, 現以教化器, 見煙知有火、 見雲知有雨、 行步知君子、 見星知有月, 吾我心盡斷, 不有我、無我。 經歷劫數期, 非月、非日數, 佛以思惟得, 非凡夫所及。 普服諸十方, 善哉!大聖尊, 去離欲界法, 處中陰教化, 此諸佛教法, 處陰不見陰。 此等眾生類, 發願各各異, 吾我自縛著, 我本彼亦爾。 佛以思惟本, 思惟本末觀, 一意一念頃, 斷垢不為難。 墜我於三趣; 垢本勝於我, 今我勝於垢, 滅汝入涅槃。 善哉,大聖尊! 獨步無二跡, 見我一跡者, 閻浮人得度。 身行有三事、 口行有四事、 意行有三事, 塵垢牛死海。 九眾生居處, 識之所經歷, 分別我、無我, 無我亦無彼。 諸佛、世尊等, 心普無有邊, 所受不可限。 一意念眾生,

爾時,世尊說此頌已,八十億中陰眾生於無餘泥洹界發金剛心,一 一成佛,與妙覺如來皆同一號。

佛告定化王菩薩:「所問有漏、無漏,有對、無對,可見、不可見,當來、過去、現在法,當與汝說。」

定化王菩薩白言:「世尊!願樂欲聞。」

佛告定化王菩薩:「諦聽諦聽,善思念之,吾當與汝一一分別。云何,定化王!何者是緣盡?何者非緣盡?六入塵垢重,染我、癡、愛法,觀內外出入息法,八萬四千度無極,生生不可滅,念念成其形,有漏八萬四千、無漏三十七。有為、無為法,此非泥洹道。身淨不犯惡、口言無有失、心淨與定合,四等遍一切,是謂菩薩行。」

中陰經賢護菩薩問事品第四

爾時,賢護菩薩即從坐起,偏袒右臂,右膝著地,長跪叉手,前白佛言:「善哉,世尊!欲、色、無色三分眾生,其識難量。何者有漏量?何者無漏量?何者有為量?何者無為量?何者有色無色量?何者有欲無欲量?何者有記無記量?」

爾時,世尊聞賢護菩薩所問事,即說頌曰:

「處在胞胎中, 受形多種類, 前滅後已生, 其如恒沙數。 三分識眾生, 塵垢非一等, 或聞聲而度、 或見形得道。 今我妙覺佛, 降神入中陰, 一一分别了, 有漏、無漏法。 得道成果證, 五色識易度, 不在有、無漏。 斯等一部界, 眾生在中陰, 如我身無異; 苦痛万陰形, 如轉輪無盡。 聲響亦無名, 吾我本無字, 觀身三十六, 欲界有量法, 三分留二分。 此中陰眾生、 不染三界苦、 五色識眾生, 無明、癡、愛惑, 隱相非不相。 有漏苦諦本, 斷結不及色; 集諦二十八, 寂然塵垢除; 三十七道品, 道諦為實果。 賢護!汝今知, 有漏、無漏法, 記法、無記法, 今當與汝說。 有記善惡行、 無記癡盲法, 墜墮於牛死, 非我無能濟。」

當佛、世尊說此語時,九十一億眾生皆發無上道意,四十七億那由他眾生盡得阿羅漢果。

中陰經道樹品第五

爾時,座上有菩薩名曰樹王,即從坐起,偏露右臂,右膝著地,長跪叉手,前白佛言:「善哉,世尊!如來所說甚奇甚特。未知如來欲說有漏耶?無漏耶?唯願,世尊!句句說之。何者有漏?何者無漏?」

佛告之曰:「有生、有滅是謂有漏,無生、無滅是謂無漏;有我、 有身是謂有漏,無我、無身是謂無漏;眼是色對是謂有漏,無眼、 無色是謂無漏;有識、有想、有形是謂有漏,無識、無想無形是謂 無漏;三識處所住有身者是謂有漏,一識一處有一形者是謂無漏。

「有形非想非非想是量法有用;不用處三禪地,厭患生死故名不 用。

「有願、不願,始發初禪。快哉!斯樂心不傾動,念淨喜安,自守 五行,成就有想有滅。

「斯出入法喜行,百八愛一念,一億行中間,想想不可盡,況彼現 在身?

「無彼、無我想,吾從無數劫捨此就此,三識所經處,非有亦無我。

「甚哉!三界苦,受身生死難。譬如工幻法,以拳誑小兒。識神無形法,起、滅無常定,我則無我身,況有識形法?想亦無想法,亦不見有識,四陰竟何在?由識而分別。

「苦陰有五行,非我、非汝有。吾從無數劫,經歷三識處,除天、鬼、神、龍,何處無妙覺?我行眾善法,誓度阿僧祇,隨形而教 化,受化不可量。

「如來清淨行,廣普無邊崖,神通內外照,觀察於三世,有形、無 形類,思惟十想結,無復塵垢患。

「虚空無邊際,不見有往來,心無中間念,忍辱功德成,積一成佛道,寂滅泥洹樂。起亦不見起、生亦不見生,況有起、滅者?諸天、世人民,能斷至彼岸。縛著染三界,經歷生死海,貪欲自纏裹,為色之所惑,永處三有中。

「佛力無所畏,威神接得度,為彼不自為,功德不可量。恒以四意止、五根、五力、七覺意寶華、三十七助道法、空無相願三昧,善權化生死,六度至彼岸。

「不以劫數期,周旋虛空界,度脫未脫者,得道如微塵。無我、無 彼想,一音演微法,受化無邊崖,道心觀察法。

「不見起滅者、分別內外身,繫於安般息——息長亦知長、息短亦知短,亂想亦知亂、定想亦知定——一向無亂想,清淨行正法。」

爾時,世尊即說頌曰:

「佛力之所行, 普潤天、世人、 學、無學眾生, 下及凡夫人, 心念斷眾相, 皆到無畏處。 分別空、無相, 清淨修道場, 莊嚴佛道樹, 皆令同一色。 轉無上法輪, 闡揚法鼓音, 之所能轉者。 非魔部界分, 甘露法藏開, 普潤一切眾, 濟度阿僧祇, 無量無等類。 無能量度者, 最勝所接度, 善哉!不思議, 所度不可量。 我本所浩行, 唯佛能稱量, 不見吾我法, 法利利益人。 功勳過三界, 得入泥洹界, 如月星中明。」 清淨無塵穢,

爾時,世尊說此頌時,八十四億那由他百千億中陰眾生諸塵垢盡,得法眼淨;復有十千億五色識眾生發心向菩提不退轉道。

中陰經卷上

神足品第六

爾時,妙覺如來即以神足化此三千大千剎土,上至非想非非想天、下至無救地獄,皆悉金色,皆如妙覺如來而無有異——三十二相、八十種好、圓光七尺——皆坐寶蓮華高座上坐,演出梵音,聲聞三千大千剎土。

一一諸佛說八萬四千雜行,其覩光明者,淫、怒、癡病皆自消滅, 異口同音而說頌曰:

「經法本無體, 滅已今復興, 斷除有漏法, 獨步於三界。 牛死無數劫, 遭遇良福田, 蒙光得解脫。 金色普遍照, 觀了本無形; 神力不可盡, 大慈大悲心, 拔濟無明等; 五陰苦本源, 流浪得濟渡; 四使牛死河, 法船渡彼岸; 入彼無為境。 善權無礙道, 吾昔發誓願, 要度未度者, 修身清淨行、 口言無虛妄、 心念濟八難, 諸惡何由生?」

爾時,有菩薩即從坐起,偏露右臂,右膝著地,長跪合掌叉手,前白佛言:「快哉,世尊!神足無量不可思議。今欲所問,若見聽者 乃敢陳啟。」

妙覺如來告彼菩薩:「善哉,善哉!族姓子!恣爾所問,吾當一一 分別說之。」 時彼菩薩白佛言:「世尊!如來神足不可究暢,令此三千大千世界 烔然金色。是何三昧有此神變?」

佛告菩薩:「此神變者,是三昧王三昧,唯有諸佛乃能變現,非聲聞、辟支佛所能。修行此三昧王三昧,將從八萬四千——或有三昧 名虛空藏、或有三昧名昇法堂、或有三昧名月光清淨、或有三昧名 破有入無、或有三昧名一意不亂、或有三昧名除去塵霧、或有三昧 名拔三毒根本、或有三昧名滅過去當來今現在病、或有三昧名開甘 露法門。」

爾時,世尊欲解斯義,宣說頌曰:

「 道力清淨行 , 身、口、意不犯 ,

誓願阿僧祇, 沒溺牛死者。

金剛難敗壞, 非二乘所及,

觀身苦根本, 思惟四果證。

積行不退轉, 閑靜坐道場,

一切入定意, 二、三、至七劫。

地燋過劫燒, 其心亦不動,

壞破魔部界, 悉成無上道。

三昧定意力, 福報不可量,

令三聚眾生, 得成無上道。

觀察眾生心, 難度、易度者,

不令在沒溺, 流滯生死海。

我本無此色, 紫磨金光體,

歷劫勤苦行, 修定成此形。」

爾時,妙覺如來說此頌時,諸佛、世尊同時舉手讚妙覺如來,以偈頌曰:

「丈夫二足尊, 世雄不可量, 拔離三界苦, 淡然為一色。 今聞如來說, 定、意、神足、道, 其聞法性相, 相相不可量。

八種清淨音、 十六特勝法、

三十二行業, 利益一切人。 天人尊無比, 光明照眾生, 久在飢渴道, 飲以八解脫。 無欲清淨池, 化以七覺花, 不著五陰本, 猶如青蓮華, 香熏遠普聞; 如來 五分身, 無處不流布。 吾昔求佛道, 誓願同一時, 今日得果證, 不違昔所願。 一相、無相道, 分別微妙慧, 曉了善權道。」

當時世尊說此頌時,有百億希望中陰眾生求佛身色紫磨金形——如 我今日神變無量——要當來世皆當成佛,悉同一號,號妙覺如來、 應供、正遍知、明行足、善逝、世間解、無上士、調御丈夫、天人 師、佛、世尊。

中陰經破愛網品第七

爾時,妙覺如來將欲破愛結使、欲使四眾自見證驗,即入不動三昧,欲令彼眾知欲愛、色愛、無色愛。

爾時,世尊重自思惟:「此欲界眾生亦愛、非愛,亦有漏、無漏,亦有為、無為,亦可記、不可記;色界眾生非有、非無,非想、非不想識可見法,三界欲最重,染著不可離;中陰眾生等,要須聖教。

「五識眾生有前、有後,非想非非想識眾生有取涅槃、無取涅槃 者。云何中陰眾生遇聖得證?

「彼有一病計無我、命恒計無常,前生非後生、後生非前生。此聖 人語,非本發心意,要須聖人,如聲聞法。 「五色識者根本未成,見佛、識佛——所著,多受福地,墮者非 一,不計吾我身,是法、非法行,三界為網所覆,欲出難得脫。猶 如擲線丸,緒在猶復還;三界眾生等,捨此復還此。」

爾時,世尊即說頌曰:

「三界為火宅, 火炎極熾盛, 愛心所染著, 將入三惡道。 前生非後生, 愛有輕重法, 五色識法者, 今世後易度。 與泥洹對門, 牛死八難道, 無彼、無此法, 最勝無等侶。 神足接眾生, 見者無不度, 乾闥、阿須倫、 當來過去人、 天、龍、鬼神等, 無不得濟度。 善哉!三界尊! 善說微妙法, 令受苦眾生, 得至無為岸, 去身、口、意病, 寂然無移動。 如飢者得食、 如渴者得飲, 止觀除愛結, 三脫甘露門。 我發無上道, 除愛無渴想, 於火炎拔濟, 得成於世雄。 過去無數佛、 當來、現在等, 如我今日化, 不計彼我想。 塵垢永已除, 正法除邪法, 無礙總持法, 思惟分别觀。 遊戲諸三昧, 於億百千劫, 往來不疲極。 四空定意法, 諸佛所游處, 多益無減損, 舉足下足頃, 所度不可量。 當我下足處, 有幾眾生等, 隨類而得度。 遍滿三界中, 隨心得三道, 如是無窮已, 八解無礙法、 離捨壽命根、 不計三界想、 害彼五逆結。 汝滅知汝滅、 汝牛知汝牛、 汝上知汝上、 汝下知汝下,

中間無脫處, 過者何處去? 當知佛力大, 遍入總持法, 中本誓願故, 未度者今度。 遍滿諸十方, 四等慈悲捨, 佛指出甘露, 如慈母爱子。 又母非父慈、 又父非母慈, 三界四顛倒, 難化如金剛。 如物初入爐, 塵惡先燋滅; 直者不移動, 如淤牛蓮華。 佛道實真正, 無畏、無所著, 不有想念累, 心亦無往來。」

爾時,座上有一菩薩名曰炎光,即從坐起,偏露右臂,右膝著地,長跪合掌叉手,前白佛言:「如今世尊說真實之法——或言有法、或言無法,或言有為、或言無為,或言有記、或言無記——今眾生受化者,以何法化而得度脫?」

爾時,世尊以頌報曰:

「諸法正有一, 無二亦無三, 愛識非愛識, 永離於胞胎, 破一縛著愛, 使眾生愛盡。 如來神德力, 自識宿命本, 或在王天宮、 轉輪王治處、 或在貧賤處、 下至無救獄, 一一分別了, 眾生垢著心。」

爾時,世尊說此頌時,六十八億那由他中陰眾生即從坐起,偏露右臂,右膝著地,長跪合掌叉手,前白佛言:「咄嗟!此苦乃是大苦,於眾苦中此愛最苦。唯願世尊聽為出家。」爾時,世尊默然聽之。

爾時,中陰眾生聞佛說法即得阿羅漢果。

中陰經三世平等品第八

爾時,座上有菩薩名不厭患劫,即從坐起,偏露右臂,右膝著地, 合掌叉手,前白佛言:「善哉!最勝如來神力,極微妙不可思議如 來神德,廣長舌不犯眾生過。今此三聚眾生——過去、當來、今現 在——為過去耶?為未來、現在耶?」

爾時,世尊告不厭患劫菩薩曰:「善哉,善哉!汝之所問於三聚眾生多所饒益、多所潤、及斷無明本、身業得清淨,非一佛所說。」

爾時,世尊即說頌曰:

「人本在胎時, 自識本宿命, 捨彼今就此, 三世炳然定。 前識非今識、 前身非今身, 但為愚惑迷, 不知趣道門。 念此在四使, 發起若干想, 咄嗟!老、病、死, 墜墮在三世。」

爾時,世尊欲解斯義即說頌曰:

「本我無此色, 受、想、識亦然。 豈有識、想、受? 我虚彼亦無, 無色名色法, 眾生亂想法, 九品有差别, 分別三世道。 上上最妙道, 非去、非未來; 上下無覺觀。 上中最微細; 中上斷三結、 中中滅三垢、 中下豁然悟, 此名為佛子。 下上雖為重, 如彼水上泡, 下中眾生類, 一生而一滅。 苦本最為深, 非我誰能知? 下下眾生類, 經歷於劫數, 吾亦就彼化, 不見漏失者。 人心有若干, 座上心不悟, 或願當來佛、 或願現在者, 此等眾生類, 難可濟度者。 人本無形生, 還入虚空中,

何者名泥洹? 牛死相牽連, 若言有眾生, 身、口、意行淨, 寂然入滅度, 無有老、病患。 弘誓發一心, 亦不自為己, 虚空不可獲, 何者名虚實? 如來梵天音, 分別實相法, 三界獨步尊。 解了空無慧, 有覺空意法, 觀身不戀著; 無覺在三禪, 進取不退道。 自我成佛來, 以此為本業, 成佛亦由此、 泥洹亦復然。 所以積功勤, 未獲於實相, 聞四不離四, 此是諸佛印。」

爾時,世尊說此頌已,無量無限那由他眾生,及中陰、五色識、非想非非想眾生,欲得去離,不樂三世。

爾時,世尊重說頌曰:

「過去非今有、 現在亦復然, 當來彌勒身, 教化無差別。 我今說少少, 如人爪上塵, 欲說世界盡, 誰能究盡者? 今雖處中陰, 移坐無想天, 地獄對門人, 聞法乃得悟。」

爾時,世尊即以神力接中陰眾生至非想非非想識天。爾時,世尊復以神力到彼,至非想非非想識界,施設莊嚴七寶高座皆有化佛,一一化佛皆有四眾,一一眾者威儀法則悉皆成就,此眾生中或有誦經、說義、賢聖默然,或有入定、出定。

爾時,妙覺如來復以神足十力接彼非想非非想識眾生——如中陰形,無有差別。

爾時,世尊如諸佛常法威儀法則,令無量化佛合為一佛,或以一身變為無量、或在樹下演說法教、或入初禪定意不亂、或在高嚴閑靜寂處、或坐處空作十八變——身下出火身上出水、身上出火身下出水、履地若空無有罣礙——或取滅度亦無滅度、或現無常身體膖脹爛臭如白鴿色、或現手足各在異處。

爾時,非想非非想識眾生見此變易心懷恐怖:「我本生心謂呼『定』是泥洹,無病、無老、無諸痛苦;今觀此法有生、有老、有病、死痛。今遇如來降神在此,若不順者,無擇地獄即我舍宅。吾本宿世同要之人。」先生彼識阿難陀、迦蘭陀見佛禮拜:「善哉,世尊!尊中無比。降神此界,如遇優曇鉢華;若佛不降神此者,我等永處邊地,殺害無量迦蘭陀身。」

復自宣白:「今遭大聖,如日消雪;若不遭聖,彼當墮墜作飛狸身,飛走盡害,無有脫者。以此本誓,願得脫苦際,虚空無量界,神德三界尊,辟支、聲聞等,眼之所能見。」

爾時,迦蘭陀作是念:「我等同生,生此識界罪福未分,或墮邪見、受飛狸身。我本造身,不獨三界——中陰、五色及無色形。」

已生此念,非想識眾皆生苦心:「我等諸人雖生此處,非得泥洹、非安隱處。今遇如來說真實法,斷拔千萬門,不去亦不來。貪欲本生我,我今還滅汝。為過所覆非,今世、後世,生有老病、苦,如影重有影、如月、樹葉影現於水,野干飲之終竟無獲。我今三世尊有實、無實,法化不變易,生者非有生。善哉!世微法,難度而度。世間愚癡人,計我為身實,當其捨壽時,鉤鏁骨相連,分別彼身中。何者命與壽?生死纏裹苦,捨彼復受此。處胎冷熱苦,出有生滅憂,母雖樂育我,不生誰有患?落漠如水泡,識神染其形,輪轉五趣中,所往無脫處,生死五道海,無往而不經。心為殺身本,汝滅我何患?虚空無本末,誰知常無常?」

彼無想之識見阿蘭、迦蘭陀,一為邊地王、一為著翅虫。「三界最為苦,本處非泥洹,如遊曠野,指東謂為西。今遭大聖,於一切眾苦都得解脫。」

爾時,非想非無想識眾生即於佛前尋聲而說頌曰:

「吾本事五火, 燒炙身體爛, 臥在荊棘上, 身被髑髏衣, 無神不奉事。 翹足向日月, 得見如來身, 今生非非想, 自恥本所行, 在此無脫處。 如來自降神, 特知正法化, 得脫無擇門, 永在安隱處。 五欲生死垢, 纏縛四流中, 心惑著三有, 燒以智慧火。 不見生本末, 四趣 万道人, 如我今無異。」 著識吾我者,

爾時,妙覺如來復以頌報曰:

「卿等本謂真, 八萬四千劫, 無常牛死本, 彼死還生此。 汝等眾生類, 未曾老、病、死, 守一求泥洹, 此非直實法。 垢盡識不滅, 還在三惡中, 非我汝不悟, 誰能脫此難? 吾從無量劫, 誓度生、老、死, 非我前身浩、 亦非後身受。 今乃教化汝: 本得金剛定, 地不可作空、 空不可作地、 水不可作火、 火不可作水。 一切愚惑人, 萬物皆我有, 愚癡無明法, 謂為正真道。 如彼疲倦人, 懈息須臾間, 雖居八萬四, 視之如一日。 為五苦眾生, 何處不有我? 分別身法相、 分別空無法,

生者不見生、 死亦不見死。 問牛根本道, 由行之所造; 三惡之重者, 癡病是其源。 此是世之常, 名色、六入法, 觸入更色法, 爱入更樂樂。 一切眾生惑, 不識十二緣, 如蛾投火光。 妙覺如來說: 由汝垢重故, 則我心垢重。 如我成佛身, 經歷不度界, 破壞心垢重, 識別想非想。 無常謂為常、 結使之根源, 以苦言是樂、 計空以為有、 無我以為我。 **此想非想類**, 習顛倒來久, 如蛾貪火光, 不避滅身難。 譬如斫伐樹, 生此非想天, 根在由復生。 無明之所裹, 今開甘露門, 聖諦真如有, 拔苦之根本, 永盡無有餘。 四使長流海, 生生生不斷, 我今破三界, 安隱無畏處。」 將到至彼岸,

爾時,世尊說此頌時,非想非非想識眾生皆發無上正真道意,於無餘泥洹而不般泥洹。

或有應生天者與說十善法,應生人中為說五戒,或趣三惡道者與說 刀山、劍樹、火車、爐炭。如此等類,三百三十六億那由他厭患劫 壽,聞清淨法即成道果。

爾時,世尊復以神足、十力、無畏接彼非想非非想識眾生,將至五 色識界眾生,修治道樹,莊嚴剎土,放大光明,一一光明皆有化 佛,一一化佛皆坐七寶高座,三十二大人之相,說六度無極。

彼五色眾生見如來變化,心垢縛著坦然除盡,不復願樂染著生死。

爾時,世尊以清淨梵音而說頌曰:

「苦本生死怨, 除之以善權, 四等大慈心, 超越無量界。 今此利根人, 一聞不再受, 覩佛色形相, 普入寂滅度。 乃知賢聖道, 無量難思議, 滅垢不復生, 盡同聖賢道。」

當其世尊說此頌時,無限無量五色識眾生盡同一號,於當來世號普廣如來、應供、正遍知、明行足、善逝、世間解、無上士、調御丈夫、天人師、佛、世尊。

中陰經無生滅品第九

爾時,妙覺如來將欲移到諸佛剎土,告三聚眾生發心趣向求泥洹道:「今我現在與汝說法,若有所疑即來問我。泥洹有生、有滅不耶?」

爾時,三聚眾生聞如來語,前白佛言:「從欲界上至非想非非想,發意趣大乘不思議法,未曾聞有有為、無為法,何者有餘?何者無餘?何者是上人法?何者非上人法?」

爾時,世尊與三聚眾生分別句義、字義及無相義:「如來神力有三十二法。何者為三十二?億本宿命中根本所生,知本所從一一所生,彼死生此、此死生彼。以眼識通觀察,如掌中觀珠;以耳通蠅行、蟻步及微細聲皆悉聞之。本有三界,今無三界。汝等受道證,發心各各異,中間等變易。何者是三界?何者非三界?」

爾時,世尊說此語時,三聚眾生重生狐疑。

爾時,世尊知彼眾生心之所念,欲得與說無相法觀,以頌說曰:

「何者名為頭? 何者名為足? 何者名為華? 何者名為果? 滅如灰十塵; 人命在於頭, 百草樹木根, 拔去不復生。 觀此眾相法, 無頭亦無足, 有餘、無餘法, 等此而可知。 若言有泥洹, 我身命現在; 若言無泥洹, 何處有三聚? 佛以神力故, 令汝知有無。 我觀三界苦, 此亦有、亦無, 前念非後念、 前形非後形。 舉足及中間, 吾從無數劫, 其中起大悲, 非二乘所及。 三途受苦者, 當我起大悲, 如慈母乳子, 無不飽滿者。 吾本一把施, 今得隨所願, 七寶眾琦珍, 隨念即時得。 六度濟眾生, 何況四等具? 此者誰能別? 唯佛佛知之, 今當與汝說, 分別有餘、無。 欲得觀我界, 吾以神足從, 到彼逮作佛, 名曰釋迦文。 七十二恒沙, 西南十莊嚴, 盡以一道化, 無辟支、聲聞。 所念即在前, 其十甚快樂, 不似此十界, 為婬、怒、癡縛。 聞者尋得度。 一音遍四方, 風吹樹葉時, 彼十七寶樹, 葉葉共相向, 皆說度無極。 我彼剎土中, 住壽阿僧祇, 現取滅度時, 遺法十二劫。 欲知劫長短, 賢劫為一日, 計此日月數, 以成十二劫。 汝等三聚人, 知我功德不? 適彼東方土, 八十億由他, 其土名不終, 佛號名滅界。 我現弟子學, 剃除被袈裟, 長跪受聖法, 彼佛知我心。

彼等眾牛類, 見我著法服, 不樂於世欲, 同心樂出家。 威儀、禮節具, 不失禁戒法, 當我屈伸時, 見者衣毛竪。 此皆本宿命, 同共誓願者, 離欲無所著, 無有生滅相。 盡修於梵行, 以我佛神力, 於死得脫死, 念此無記等。 不解牛以滅, 輪轉於五道, 四聖甘露法, 充飽一切人。」

當其世尊說此頌時,見此初學弟子剃除鬚髮受聖教;百七十億眾生願樂欲得思惟法觀,不樂在家,出為沙門。

佛告三聚眾生:「我今東北方無限無量恒河沙數,彼有剎土名曰清明,佛名明月。彼土人民無婬、怒、癡,亦無憍慢、我慢、不如慢。彼土眾生恒樂安靜,獨坐無為,繫念在前,初無亂想,雷、電、霹靂,心無傾動。」

爾時,妙覺如來適彼剎土遇地而坐,彼眾生見坐禪者悉共效之。

佛以神力、以無想法觀, 迴眾生心如手轉物, 令彼眾生知有常、無常, 知生、老、病、死苦, 或有眾生令知有念、或有眾生令知有 持、或有眾生令知有安、或有眾生令知自守。

佛將欲現四禪功德,即於三聚眾生前,從初禪出入二禪、三禪、四禪,從四禪起入三禪、二禪、初禪,從初禪至三禪、從第四至第二禪,此名師子奮迅三昧。

爾時,世尊現此神足三昧定意度無限無量那由他眾生,皆共同發無 上正真道,有願樂須陀洹、斯陀含、阿那含、阿羅漢,法眼淨得辟 支佛道。 當於爾時,妙覺如來忽然不現。

中陰經空無形教化品第十

爾時,妙覺如來捨中陰形入虛空藏三昧,以佛吼而吼出八種音聲。何謂為八?非男聲、非女聲、非長聲、非短聲、非豪貴聲、非卑賤聲、非苦聲、非甘露聲。

爾時,世尊隱形不現,演出八萬四千諸度無極。何謂八萬四千度無極?想非想有愛入結使患本,如月雲覆,一切眾生為欲所牽,有四百病,一生而一滅。人犯五逆,欲離泥犁去,見八地獄,衣毛皆竪。

南、西方、北、東亦爾,以聞響眾生故,演此諸法。

當於爾時,三聚眾生聞虛空語聲,無色、無形,於其中間演出諸法:「善哉!諸佛教無色、形,難可思議。」

爾時,三聚眾生異形同音以頌仰問處空曰:

「如來本在此, 三十二相具,

慈悲愍一切, 所潤難可量。

為我說微妙, 八等聖道支,

隱形聞聖音, 萬物皆無常。如來黃金色, 本有今不見,

但聞音響聲, 佛無我豈有?

計我生死本, 流轉而不住,

但為色所惑, 福滅而罪生。

如來大聖尊, 示人行諸法,

忽然離形相, 音響來教化。

以本宿緣故, 形逝音接我。

老、病牛憂、悲, 四蛇唼我身:

地種骨肉是、 水種潤澤是、

火種枯燥是、 風種散法是。

無著三乘法, 離有故在有;

心垢久已離,四種故存在。如來大聖尊,無彼此四大。 正言有四種,亦復無四種; 正言無四種,亦復有四種。 此是不定法,誰能究竟者?」

爾時,如來答彼音聲,即說頌曰:

「佛子!知空不? 一切法無常。 人生非本生, 豈有本生緣? 我音及汝音, 可得、不可得? 不為一眾生。 吾從無數劫, 一念一息頃, 度少不以愁; 所度阿僧祇, 亦不以喜悅。 我本為一人, 閑靜不度人, 後緣而對人, 不失本誓願。 處此閻浮提, 四姓剎利勝, 除彼婆羅門, 餘姓最不如。 以本法界觀, 生、老、病、死苦, 我無彼亦空, 何者有生、死? 生者言有本, 生者從何至? 設知牛死本, 泥洹在我前; 解知泥洹法, 無佛亦無我。 法從何處生? 去至何處滅? 佛以直實法, 現以有無相, 此生此滅處, 愚惑得見正。 言有亦非有、 言無亦非無, 為五欲所縛。 輪轉牛死海, 無驅、無鞭策, 自墜牛死淵, 爾乃知罪、福, 知悔、不悔者。」

爾時,世尊說此頌時,八十七億那由他三聚眾生解無形相法,發無上正真道意。

中陰經有色無色品第十一

爾時,座上有菩薩聞空中有如來聲,仰觀空中嘆曰:「甚哉!但聞其聲,不見其形。此色非本色,餘陰亦復爾。此欲界眾生難可免度,要須智劍剔除令無餘。我本修梵行,非身、口、意造,非一、非二。欲我從汝生,由汝墮三塗,一念欲滅,眾想亦無去、來、今。過去諸如來,教化群生類:說過去,不說今、未來;說未來,不說過去、現在;說現在,不說過去、未來;或言有三世、或言無三世。」

爾時,世尊欲重解斯義而說頌曰:

「牛、老、病、死本, 諸如來塵垢, 要入中拔濟, 何為地獄人? 在中陰教化, 不似妙覺尊, 於妙妙中最, 下劣所不及。 隨彼所施與, 如人持鉢乞, 『是有、是無耶?』 持鉢者思惟: 邪見之根本; 未證白謂證, 正法言非法, 流轉五道淵。 正法分别法, 不失於法性; 若不失法性, 此是諸佛教。 亦無去、來、今。 法性無三事, 現在何者是? 若言是現在, 過去何者是? 若言是過去, 未來何者是? 若言是未來, 曉了三世尊。 人能解此法, 解本無雜想, 順一大乘行,

有緣眾生善,

爾時,大勢至、觀世音菩薩承佛威神音響教化,即以神口而說頌曰:

「生、老、病、死本, 諸如來塵垢, 要入中拔濟, 何處不往反?

濟此無不度。

猶如負債人, 償畢欲歡喜, 內外悉通達, 周旋不怯弱。」 我師無量壽, 永劫不滅盡, 本我所誓願, 何為地獄人? 不似妙覺尊, 在中陰教化, 於妙妙中最, 下劣所不及。 願我後成佛, 如妙覺無異。」

爾時,觀世音說此頌時,三億眾生發無上正真道意。

中陰經歡喜品第十二

爾時,妙覺如來入寂滅三昧,將欲遊行他方世界顧見所度。

不可計眾生心懷踊躍,猶如比丘入四禪法,心意淡然,無飢無渴: 「善哉!教化不失本願。」心懷自慶而說頌曰:

「如來神足力, 離苦、不善、有,

處處分身化, 要度有緣者。

賢劫千佛等, 所度無有異,

亦在三聚中, 正法除非法。

甘露法門開, 掩閉三惡道、

稱揚大智慧、拔出愚癡根。

諸法自瓔珞, 內外悉清淨,

慈悲四等心, 無方不遍滿。

攝持身、口、意, 超越生、老、死。」

爾時,世尊說此頌時,群方三千大千世界滿中三聚眾生,承虛空中教,皆發無上正真道意,歡喜奉行,作禮而去。

中陰經卷下

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".